



7 APERILA 2018 ~ Lomiga 11 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication



Tala mai Amerika



ARIZONA: E 20 pasene le siitaga ua pasia nei mo totogi o faia'oga a le setete o Arizona. O le tali lea a le kovana o Doug Ducey ma lana pulega ina ua solotetee faia'oga mo se 6 aso. Ua sauni nei faia'oga e toe foi e fa'aauau la latou fe'au. O le 20 pasene e totogi faavaega, muamua le 9 pasene i le a'ega e feagai ma le tautoulu, pito le ta'i 5 pasene i tausaga e lua o i luma. E le ese le faafitauli o Arizona ma Niu Sila i le leai o ni faia'oga. Ua mafua ai ona soona mamafa le galuega ma afaina le pitolaau a faia'oga. O loo taumate pe faaluaina le ofo a Arizona e le malo Niu Sila mo ana faia'oga, o loo talosaga foi mo sa latou siitaga.

NEW JERSEY: Ua faaleaga le ofo a Arizona e se tasi asiasi a'oga a le setete o New Jersey, ua molia i le faatitipa i le malae a se a'oga. Ua molia le alii o Thomas Tramaglino, 42, i le vao solitulafono e aofia ai le faa'ainaelo ma le amio le mafaufau. Na tau saili e le a'oga le tagata o loo ia faa'oga lo latou malae taalo ma faleui, ma iu ina tapa le fesoasoani a le tekonoosi. Na maua e le mea pu'eata le asiasi a'oga o loo fai lana pisinisi ma logoina loa leoleo. O Tramaglino na te umia se faailoga PhD, e totogi lelei, \$213,000 i le tausaga. O loo tauiso tagata pe ua mafua i se a lana amio.

TEXAS: O se teine a'oga, 16 tausaga i le setete o Texas, na malia i se faalavelave taavale ina ua taia ma taavalevale le taavale na malaga ai ma ni uo. I le lipoti e faapea na ia tatala lona fusipa'u se'i pu'e sona ata (selfie), ae fetui ma le se o le taavale i tua ma le ala. Na lelea ese ina ua mafuli le taavale. Na o ia na aafia ae na faasaoina isi o le pasese; o i latou sa fai fusipa'u. Ua fa'aaoga e leoleo a le setete le malia o Kailee Mills, e molia ai le fe'au o le malaga saogalemu i taimi uma.



O loo faasolo ni polokalame i Aukilani mo faia'oga o a'oga faamasani. O le sini, e faamasani faia'oga ona fepe'e i luga o laau. Talu ai o tamaiti e fiafia e fepe'e e tatau foi i faia'oga ona maua sea tomali. E le iloa mea tutupu, pe pe'a se tamaitiiti apili i luga o se lala, e tatau loa i le faia'oga ona pe'a e aumai i lalo. Talitonu e le o se faafitauli mo a tatou faia'oga, ua lava le potomasani mai Samoa, leva le fepe'e i soo se ituaiga laau. E 'a'e gofie laau a Niu Sila.

Tia'i Vitoria ae sui i le lunivesite a Ueligitone



O le a le mea o iai i le igoa fai mai ai le fatusolo, a ua manatu taiulu o Vitoria ua tataua ona fai se suiga

Ua tonu i taiulu o se tasi iunivesite matua o le a sui lona igoa.

O se taimi e le o mamao ona le toe iloa lea o Vitoria ae o le a tauave le igoa fou, O le lunivesite a Ueligitone.

I se faamatalaga a le taiulu o le a'oga (VC) polofesa Grant Guilford, na ia ta'ua ai lea faiga o se mea ua talafeagai. Talu ai e iloa gofie le tulaga o se a'oga ma le nofoaga e iai, o le mafuaaga malosia lea i tua o le faaiuga.

O Vitoria ua lausilafia i Niu Sila nei, ae

taumate pea e i latou mai fafo poo fea tonu e iai. Manatua e iai foi le iunivesite a Ausetalia e igoa ia Vitoria (Victoria) i le setete o Vitoria.

Atoa foi le taua o le tauaveina e se iunivesite o le igoa o le taulaga o loo tu ai.

Sa iai ni uluai taumafaiga e sui ia Ueligitone ae na lei manuia.

O loo talanoa le pulega i se igoa Maori o le a'oga e o faatasi. Ua iai Samoa, o Ueligitone.

Ripoti o le Vaiaso:

Mana’omia se piliona fa’aopoopo mo atina’e a’oga

Fai mai le minisita o A’oga, Chris Hipkins, e mana’omia e le malo se piliona tala faaopoopo e faalava ai le tau o fuafuaga mo atina’e o loo faagasolo nei mo a’oga a le atunuu.

O se mea e lei mate’ia e le faiga malo, a o lea faato’a alia’e, ma e tuua’ia e le minisita le malo na se’i mavae atu.

Fa’aalia e Hipkins o le tele o atina’e na folafola e le National i lo latou taimi ae iloa ane e lei tuua i ai ni tupe. Tula’i mai le malo fou ma iloa le faaletonu, o lea ua omia ai i le va.

Na pasia e le National se \$1.137 piliona mo le toe faaleleia o falea’oga a Kenetaperi, ae na o sina vaega o le tupe na tuu i ai.

O nisi o poroketi o falea’oga fou ma na o loo fia faaleleia, ua fesiligia nei ni faamae’aga.

O lea la ua avea ma se avega faaopoopo a le Leipa. O se mea e le mafai ona ia ‘alofia talu ai o a’oga le tasi vaega taua o ana faamamafa.

Faaalia e le minisita o Chris Hipkins ua sauni le malo e faatumu le pu lea na eli e le National, ma faamae’a le galuega mo Kenetaperi.



A’oga Teine Kalaiesetete le tasi o loo faalavelaveina ona o tulaga faaletonu i le faatupega o le galuega

Na matua’ia e le minisita le malo ua te’a atu i le faimea faatafulu, e pei ona aliali mai i le le mae’a ona tapena tulaga ia. Atoa le leai o se vaai mamao i le tulaga siitia o le numera o fanau e fua i aiga o loo ua toe lolofi atu i totonu o Kalaiesetete.

O se faigamalo lenei sa fiafia e tatala le faaulufale mai o tagata i totonu o le atunuu, ae na te le mafai ona tapena le lotoifale a’oga e fuafua i le siitia o fuainumera, saunoa le minisita e faatatau i le National.

E foliga mai o le a faapafala nisi o folafolaga a le malo sofaatasi, ina ia mafai ona auala le faamuamua i a’oga ma le soifua maloloina, o mea aupito taua ia i folafolaga a le malo.

I se lipoti i le tulaga faagasolo o galuega i Kalaiesetete, na o se 22 mai le 115 falea’oga ua mae’a ona faaulufale. E iai galuega ua tutu ona ua leai ni tupe e faagaioi ai. Ua faailoa fo’i lagona o le le fiafia i pulega ma matua, ona o aafiaga o a’oga a fanau, i le tulaga taumate o loo ua aliali mai.

Siligia le tofa a se pule i se taiala e fa’aaoga ai le P

E iai se pulea’oga i Aukilani o loo feagai ma le ma’ema’eā o nisi matua ma le ‘aufaasalalau tala fo’i.

I le a’oga maualuga a Massey e pule ai Glen Denham, na te lagolagoina le fa’aaogaga o se alaga’oa e a’oa’o ai le fa’aaogaina o le pauta faasāina, le methamphetamine, poo lea e iloa gofie i le mata’itusi e tasi, P.

Na logotala i ai se tasi o matua ma ia logoina loa le ‘aufaasalalau.

O le tala a le tina ia Sarah Clare, o lenei lautusi o se taiala e faata’ita’i ai i fanau le tagofia o le P, ona pau lea o lana faauigaga. O Clare e a’oga lana tama i Massey, e Tausaga 11.

E 10 ni faatonuga i le ta’iala e iai nei:

‘Afai e te tagofia le meta [P] ’ai sina mea’ai i le ta’i 4 pe 5 itula; inu e sili atu ma le tulaga masani; ma afai ua atoa le 24 itula o e ala; fai sina malologa.’

O le isi lea: ‘Afai e te fa’aaogaina se paipa tioata, to’aga e fufulu mamā totonu ma ave ese toega o meamu e te ono manavaina i totonu.’

Ae faai’u i lenei: “E sa i le tulafono ona fa’aaoga le meta, pe umia se



A’oga a Massey i Aukilani i Sisifo; Sisifo o le tasi itumalo e malosi ai le fa’aaogaga o le P

paipa. Ia fai ma le poto (be discreet), ua lava se 5 kalama e te teuina mo oe.’

Ina ua fesiligia le pule na ia saunoa e faapea ua ave sese le uiga o le ta’iala. Na ia puipuia foi lona aoga o se alaga’oa e lapata’ia ai le fanau i le leaga o le P, ma aafiaga e tula’i mai pe a latou tagofia.

Na ia viia foi le popoto o fanau i nei aso e iloa ona faavasega le uiga o faamatalaga ma faia fo’i filifiliga e tatau mo latou.

Peita’i e iai le vasega o matua e pei o Sarah ua sauni e lu’i le pule ma lona taofi. Ua aga’i atu la latou sailiga i le malo ma le fesili, pe aisea ua fa’aaoga ai e le faalapopotoga Drug Foundation a Niu Sila tupe a le ‘autogi lafoga, e lolomi ai ni ta’iala faapea.

O loo taumau le pule ma le a’oga i la latou mau. Ae fai mai matua e le fesoasoani le mea a le pule i le tulaga o Sisifo, o se tasi itumalo e taulamua i le fa’aaogaina o lenei vailaau.

Tagofia o pauta faasāina o se ma'i e le fofoina e ni tupe

Ua le o po se lilo i nisi o le aufaitau i le mataupu e pei ona laga i se tasi a tatou lipoti o lenei lomiga.

O le finauga pe tatau ona ave faamatalaga o mea ua vaoia e le tulafono—pe ua tuu i ai tapu faalelotu ma faaleaganuu—i fanau a'oga, o loo fa'aauau pea. Ailoga foi e muta le finauga i o tatou tupulaga.

E foliga e leai se itu e naunau e tuu'aulafo, fai mai le poto o le tasi ae fa'aali atu le silafia o le isi.

Manatua, e le na o Niu Sila e aafia i lenei mataupu, toe o malo uma o le lalolagi.

O le mataupu i le tatau ma le le tatau ona tagofia pauta ma vailaau faasāina, ua iloa lona ma'ale'ale.

Ae sili le ilitata o matua pe a fa'aaoga e se pule poo se malo o latou maso e faamalosia ai le a'oa'oina i totonu o potua'oga, e aunoa ma sa latou maliega, poo na foi o le fanau.

E foliga mai e malo lava le finau a pulega i lo se leo o matua. Ma atonu o le a afea lea i le talanoaga o loo ua fuafua nei i le toe iloilo o le A'oga Ataeao.

Fai mai le pule a Massey, o le ta'iala o loo pisa ai o se tasi alaga'oa i le faitau selau alaga'oa i totonu o lana a'oga. O le uiga o lana faatatau, e lelei le avanoa o fanau i le tele o alaga'oa e mafai ai ona fai ni faaiuga lelei.

Ae fai mai Sarah, e le mana'o i lana tama e tilotilo i nei faamatalaga, aemaise o lenei lava ta'iala.

E iai le moni i le finau a Sarah, auā o lenei ta'iala e foliga e faasino tonu ia i latou ua tagofia le pauta o le P.

E pei ona folasia i le lipoti, o ni faatonuga nei e ta'ita'iina ai lona fa'aaogaina. E 10 le aofa'i, e 'auga ia i latou ua fai le P ma masani.

Aisea e fa'aali ai fua i fanau? Pau le fe'au o le tago loa e faata'ita'i. Pe tupu ai le manatu, e le afaina o lea e iai taiala e toomaga i ai. Aisea e faaeleelea ai mafaufau mu'a o fanau ona o le upu a nisi e manatu e sili lo latou iloa nai lo matua?

E le ese lenei mataupu ma lena o le feusua'i faaulugalii, ma lona a'oa'oina i a'oga, o loo mau eseese ai pea lenei atunuu. Ma isi foi malo. Pe tatau pe le tatau e leai se vave na te taliina.

E tali tutusa mataupu ma mea sa tutupu, faitio matua i le a'oa'o o se mataupu e foliga ua faasino ma tauanau fanau ia faia.

O nei tagata e aunoa ma sina iloa o



tu ma aga a isi tagata. A ua faalupe i latou o ni 'faamatua.'

Ua aumai a latou tu ma aga i le fafao i loto ma manatu o fanau e ese mamao o latou lalolagi mai ia i latou.

A o se tau lea o loo totogi e faiganuu laiti i totonu o ni sosaiete e faumalo ai se lanu poo se gagana e tasi. Pe faapea foi, o se sosaiete e talia ma onosa'ia soo se ituaiga amio ma soo se taofi.

Tatou te tilotilo ma faauiga soo se mea i le fa'ata a le Kerisiano atoa a tatou aganuu tausafia, o le ala foi lea o le fetoa'i ma le tele o tu ma aga a le vaitele o tagatanuu Niu Sila.

Manatua le lafoga, o le a'oga ma le ola a'oa'oina o ni mea se lua. To'atele le 'aufaigaluega i a'oga e a'oga i faamatalaga ma popoto ai, ma latou faasoa atu i fanau. Ae le to'atele e maua'a le soifua a'oa'oina i aga a isi, e atagia ai se silafia i fanau eseese o loo nonofo mai i o latou luma.

Latou te iloa ai ona ta'ita'i la latou galuega i le tofa taofiofi, o se mea o loo naumati ai le laufanua a'oga i lona ta'ita'iga. Ua na o se fagogo tagi ao le 'know your learner' ae le o atagia i mea e fua mai.

Pau le mea mautinoa ua feoloolo se vaega o talavou a le Pasefika, aafia ai Samoa, e tagofia le P. E iai ni a tatou aiga ua mafatia ona o nisi o fanau poo e tau i ai ua afaina ai. O i latou na e 'aulagona le mata'utia o aafiaga o le P, poo nisi vailaau.

O se popolega lea i o tatou ta'ita'i pe a matau le faia'e o sauaga tutupu, e ta'u ai a tatou talavou faatasi ma le P.

E le fā'ia le taua o le avanoa o fanau i faamatalaga aogā, ae le o faa-matalaga uma. Aemaise o na e foliga e faasino ai i latou i le ala i Seoli.

E le o fanau uma e fia o i Seoli, aisea e faasala uma ai i le mana'o o sina vaega e fia savalia lena auala?

E mafai ona faasino i le fanau le inuina o se vailaau e foia ai le tale poo le ulu tiga, ae leai se matua na te a'oa'o sana fanau e folo ni pauta oona.

E moni le faitioga a le Family First NZ, o se faiga faavalevaea lenei.

Atoa foi, o loo iai fanau i se laasaga maaleale, e lei iloga le atina'e o le mafaufau e fai ai ni faaiuga lelei, molimau le saienisi. E le fesoasoani se taiala faapea e molia ai se fe'au sese i le mafaufau i sea taimi.

E lagolago e le faasoa le finau, e tatau ona saili se finagalo 'autasi o matua pe a oo i mataupu ma'ale'ale faapea.

O loo faumalo pea le malo ma a'oga, ma e le o se temokarasi lea faiga, e le komunisi foi, a o le pule faasoloatoa.

E atagia ai le fuao o pulega o se tofa ma se faautaga a matua; e atagia le uiga faaali, e popoto atu pulega, latou te iloa la latou mea o loo fai. A ua tatou iloa le sese o se na manatu e fua i molimau.

A tatou tilotilo i tua atu, ona iloa atu lea o le pule 'ailililo a le 'aia tatau' ua na faalanumia mea uma. E pule lava le tama a le loomatua ia e pei o le gagana. Ua tuuavanoa i ai malo ma pulega. E taua le aia tatau i lo le amio. I nei aso e le pule le tasi i le faiga o le amio a le isi. E leai se fuataga se tasi o se amio. O le atamai lena o nei tupulaga.

E foliga ona pau le mea a le malo ma pulega e fai o le faatali se'i valaau mai mo se fesoasoani; pe a taunuu le moliga o le ma'i i le falema'i. O le iuga lena o le tulafono e 10 o lenei taiala.

Fai mai le 10, 'Fai ma le poto.' E faigata ona iloa atu se momoi poto i totonu o lenei faaupuga.

Auā o le taimi e tagofia ai le P e leai se toe foi. O se mea e tatau ona silafia e le pule a Massey, e le fesoasoani sona taofi i se itumalo o loo iloga le afaina ona o le pule a le P. O ia e tatau ona fai ma le poto lona faiva.

E faitau piliona ua faaalu e le lalolagi e tau foia ai le faafitauli. A ua tatou iloa o nei togafiti ua na o ni fonofono i se ma'i e le mafai ona foia i ni tupe. E aafia ai taiala e pei ona ta'ua, o ni vaega o lena togafitiga tautupe.

E iai a tatou lava fofu, e faaleagaga ma faaleaganuu. Ae le o lagonaina, ona o isi pule ma malosia i luga a'e.

“mafaufauga o le vaiaso”

E pala le tino ae tumau pea le agaga

Talitonuga Lotu lutaia



ME 6-12

7

1908 Taunuu i Apia le tusitala Jack London (John Griffith) ma lona to'alua i lo vaa Snark

8

1922 Aso fanau palemia lona 3, Tupua Tamasese Lealofi 4

1942 Taunuu i Apia le USS Sumner ma se uta meatau

1967 Tofia ulua'i leoleo tamaitai—Mary Theresa Pavitt, Anastasia Carolyn Schmidt, Annie Elaine Laumea, Theresa Tavai, Katalina Ieremia, Mele Fanene Vaeau

1969 Pasia faamaufaailoga malo Samoa

9

1838 Faatu uluai falesa LMS i Pago Pago

1881 Maliu misionare Toga Panapasa Ahongalu, lagomau i Samoa

1961 Aso o le pelepesite e saili se finagalo o Samoa i le tutoatasi. 79% o e na palota e lagolagoina, 13% leai, 8% e faaleaogaina palota

10

1842 Taunuu le SS Bellatrix ma le SS Cawley i Apia ma ni uta o totoga galuega malae vaalele

2012 Avea Samoa ma malo 155 auai i le WTO

11

1964 Amata galuega tanuina o le Eleele Fou. Tanu ai ma toega o le Adler vaa Siamani

2007 Tuua le malo e Malietoa Tanumafili le 2

12

2005 Maliu Rev Dr Faitala Talapusi i lona 53

Eleele na tanu ai maseiga



E

ta'u le fasi fanua o loo tu ai nei le fale o le malo o le Eleele Fou—o le malae i Matagalalua, e faalava tonu i le talaluma o Apia pei se tuugamau i lumafale o se aiga. A tilotilo i le

faafanua o Apia e lala ese le tanuga lenei. Atonu o iai se molimau tusitusia e faa-matala tonu ai le mafuaaga o lenei tanu a le malo i lea taimi. Pau lea o le tala sa faalogo i ai i le aumatutua i na aso, o le tanuga lenei o toega o le vaa a Siamani o le faatusa o manatuaga o le tala faasolopito o maseiga ma fevaevaea'iga, i le va o aiga ma ta'ita'i o Samoa e muta ai. La lea o le tanuga o se faatusa; tanuma'i leaga ua tuana'i ae sagai ane e amata se lumana'i toefuata'iina e ala i le malo fou tutoatasi. Atonu foi e iai se itu taule atina'e (e mafai ona faailoa mai, e fiafia e faailoa atu), ae sa malosi le lagona i tagata Samoa o le tanuga e faalefaatusa lona faapogai. Ma na taunuu lava faanaunauga, i le tulai mai o le malo fou, faaauau e Malietoa Tanumafili le 2 ina ua tuumalo Tamasese Meaole, se tasi o nofoaiga umi ma le toafilemu i le lalolagi, o loo molimauina pea e oo mai i lenei taimi. O le tausaga 1964 i le aso 11 o Me na amata ai le tanuga, a o le aso tonu foi lea na tuumalo ai le Ao o le Malo i le 2007, e foliga e femolimaua'i so la taua i le aso ma lona uiga loloto. Mai le 1962 e aulia le 2007 na atoa ai le 46 tausaga o le uluai nofoaiga. Ae le faitauina le tautua a i laua i tapenaga mo le tuto'atasi, a o lei tula'i mai e avea ma ulua'i ao sosoo.

Me i le Tala Faasolo o Niu Sila



6 Me 1869. Osofaia Tuhoe (Urewera) e fitafita a le malo

7 Me 1856. Avea Henry Sewell ma uluai palemia a Niu Sila. 14 aso na palemia ai

9 Me 1907. Lomia le uluai School Journal a Niu Sila mo a'oga. Maua ai tala o Niu Sila lava ia

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editor:
Levi Tavita, MPS, BTheol, BA, Grad Dip Tchg
ltavita8@gmail.com
Reporters:
Saili Aukuso, MA, BEd, DipTESL, DipTchg
saili.niupac@gmail.com
Vavao Fetui, MA, BEd, DipTESL, DipTchg
ola.niupac@gmail.com

EVALEON BOOKS & NIUPAC PUBLISHING




Telefoni (03) 382-6674. Tuatusi meliE: evaleon.books@gmail.com

Sponsors:


Evaleon
Books &
Niupac
Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.



TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright

ACROSS


1. think (6)
4. light (4)
8. blur, not clear (4)
9. strong (6)
11. tennis (6)
12. pass the ball (4)
14. cry out loud (2)
15. smart (6)
19. extract, take pods off cooked cocoa beans (4)
22. husk coconut (2)
24. stupid (5)
27. church organ (5)
28. centre (3)
29. donkey (5)
30. office (5)

DOWN


1. remember (7)
2. Old Samoa's war goddess (7)
3. tea (2)
5. rub against (5)
6. inch (5)
7. hush (3)
10. Asia continent (4)
12. flying fox (3)
13. pair (3)

16. past (3)
17. sleep (3)
18. root plant (2)
20. wooden tablet for making designs (5)
21. holding (5)
23. Bible student (4)
24. rail 'prophet' bird (3)
25. challenge (3)
26. army (3)

Tusi e fesoasoani:



Solution ~ Tali



Laufulatu Samoa: Levi Tavita



FUGA I LE TAU O LAU TOULU

(mo Saili i lona aso fanau; ma Leonard i lona faau'uga)

O italia i fafo o lo matou faitoto'a ua leva le faafiafialoto ia i matou talu le te'i mai o le taututupu, ma fofola le fala felanua'i a le taumafanafana; O i latou e faafeiloa'ia a matou malo asiiasi a o lei ulufale; e ifoifo mai pei ni Sapani fa'aaloalo. *Konnichiwa!*

Ua leva lo latou matea o le tupua: o se fale tuai ma faaleiloga lenei; Ua naunau ai e fa'aatoa i so latou malosi le mau ava e fia faatumu—samasama o se lanu e ata mamao;

Lea ua saga lauusi ai ma lapopo'a o latou fuga, ma so'ona lolo'u foi lo latou ava ma le migao; (O la'u tala musumusulu lenei: E vaivai o latou 'au, e lē pei o la e tolu i le fagu a Vincent poo fa'i fua sesega i laufanua sa ou masani ai).

Ua toululu isi i se savili malosi na agi e lei mamao, toe ai na o le tasi lenei. Na ou fesoasoani e taofiofi i luga.

E iai le tufuga na ia faalanu le suavai, ma tautau a'e sona ata faaleiloga i se te'e laau.

E te le iloa lo'u fiafia i lou tulata mai.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Sir David Attenborough

Aso Fanau: 08 Me 1926

Ausiga: lauiloa i le faasalalauina
o polokalame tau le lalolagi o meafaiola
ma le natura

Fetu: Torusi



E le ese le faipolokalame faasalalau ma se faia'oga, aemaise pe afai e te talenia i lou faiva ma ese foi lau mataupu. O le alii Peretania o David Attenborough le tasi ae afe i lona faiva, o se ua leva tausaga lona avatua i totonu o potu malolo ma olaga o tagata o le lalolagi, o soo se ituaiga o meafaiola ninii ma mata'utia le lapopo'a. O lea ua ta'ua ai o le leo ma foliga o le lalolagi natura e faailoa atu le fe'au. Mai urosa ma tafola tetele e oo lava i se tamai apogaleveleve, e auiliili ma'eae'a se faamatalaga, ma tatou popoto ai foi. A'oa'oina i le mataupu i le saienisi faalenatura, o le tele o taimi o lana tautua o lena o se tagata faigaluega a le BBC. O se tasi e iloga le pulunaunau i le faasaoina o le siosiomaga fanua ma meafaiola uma e maua i ai—lau ma o latou ituaiga, manu ma iniseti ma o latou ituaiga. Mai ia Attenborough le fe'au, e leai ma se mea na faia e leai sona aoga i le ola. E mafua ai lona naunau e faasao ma faauualoa mea uma. O ia se tasi leo amana'ia i le valaau mo le faalaloina o le gasa oona o loo feula a'e e fale gaosimea ma faatele'a'i ai le mafanafana o le kelo. O lana misiona o le faasao o mea na ua vave le tafi esea ona o gaioiga a tagata, e iai nisi o ituaiga manu e ono le toe vaaia i le isi 20 tausaga, pe a leai se puipuiga malu mai le 'aufaataumaioi. O lana upu, e leai se matua e mana'o e faaali se ata o se elefane i se api i lana fanau; e naunau uma e faaali i ai se ata o le mea moni. Ua 92 tausaga o le soifua a o loo tautua pea i lona faiva.



ATI A'E UPU:

saienisi faalenatura (nauna) o se vaega o le saienisi e faatatau tonu i le su'esu'ega o le natura faitino o meafaiola i o latou faamatalaga ma uiga; Igilisi—natural science. **mata o le la** (nauna) o se ituaiga o le teisi (daisy) e afua mai Amerika Matu; e lapotopoto pei se la ma ona ave e sasama malos; Igilisi sunflower. **italia** (nauna) o se laau e fai ni ona fa mai le auaiga o le teisi, afua mai i Mesiko, e malososi o latou lanu; Igilisi—dahlia

Tulimanu o Pola:

O le a sou taofi? E te lagolagoina le pule a Massey ma lana finau i pauta faasaina?



Soifua manuia i le mamalu o sui faitau a le OLA. Ua manatu e fai sina suiga i lenei vaiaso. Talu ai le taua o le mataupu autu ua manatu ai se'i tuu le avanoa i nisi o le mamalu. Sa ou siligia ai ni finagalo o ni matua se to'alua:

Faafetai Mene

Tama Tusi aiga



E ta te le mana'o ai e fai i tamaiti ma a'oa'o le faiga o na vailaau faasaina. E le aoga e aafia ai le mafaufau ma le tino.

Ua aumai tu a isi atunuu e faaofi mai i Niu Sila, ua atili leaga ai tupulaga. Ua le usita'i,

maua ai le fasioti tagata. Ua fasioti lava e fanau o latou matua ona o tupe e faatau ai vailaau. Ua le mafai ona momoe pe tolu aso o uiga na e aliali mai i nei vailaau.

Ou te lagolagoina le taofi, e tataua ona faalogo a'oga i le leo o matua. A le manana'o matua ona tuu lea ae le o le fai lava o latou. O le tele o tupulaga talavou ua faaseseina. E oo foi i Samoa. E le uma le mana'o pe a masani ai, e pei lava o le tapaa ma isi mea faapena. E tataua ona faamalosi ni faasalaga a le malo. A vaivai e atili leaga ai fanau ma afaina ai ma aiga.

O le susuga ia Faafetai e afua mai Papa Sataua i lona tamā, Su'a Mene, a o lona tina o Saunao Lemau mai le afioaga o Fasitoouta. E alala i Kalaiesetete.

Fau Fonoti

Tina Tausi Aiga

Ou te le lagolagoina ma e le o se lumana'i lena mo le fanau.

A faata'ita'i loa i nei vailaau leaga o le a ola i se olaga leaga, o le a talepe fale, gaoi, falepuipui, fasioti tagata.

Ona o aafiaga i fualaau faasaina, e na o misa ma fevaevaea'iga e tutupu mai ai, auā ua leiloa le va ma isi tagata. Ae sili le leaga, o le le ava ai i matua. O le a fai i latou ma faata'ita'iga leaga i o latou tei lait, ma taomia ai le olaga Kerisiano.

O le a aafia le tino i faama'i ma toe tigaina ai matua e tausima'i, ma su'e ni tupe e togafiti ai.

Talofa i nai matua o le a ta'uvalea ma upuia, ae lei fai atu latou i fanau e o e fai nei amio.

O le susuga ia Fau o se tina tausai aiga e alala ma lona alii, Sililo Fonoti, i Kalaiesetete.

